

其贓物亦不現然玉山等七人皆是才白丁而互相結黨常聚崇禮門外福德家不殖產業遊戲為事為盜明白雖無現贓請分配世祖朝亦有明知為盜而贓物不現者皆令分配絕島此有前例仍書石山千石等家舍以啓曰千石則雖與金伊江同謀方金伊江之逃追捕進告縱使不死可以免罪然千石父子盜李芳財倍於他人不可以不見其供但治其罪而不徵其財請賣二人家舍以償李芳傳曰依所啓○命削金繼宗錄案于司憲府司諫院獻納洪潤德啓繼宗罪犯綱常雖沒世在所不赦當初錄案豈不詳慮今遽削之甚不可以一繼宗之故毀萬世綱常可乎掌令孫蕃亦啓罪犯綱常固不可輕赦不聽○三水郡被虜人口推刷敬差官金瑄來復命圖三水賊人入寇之路及被虜人等家舍以進仍啓甲士韓哲同當彼人入寇之時馳由徑路毀其機道以絕賊路奪賊馬六匹請論哲同之功以勸邊人傳曰韓哲同其論功○傳于承政院曰六月三十日夜予在大造殿觀之天際有如祥炬之氣上觸于空流動不定初若自南山上而向東俄復西流又轉而向東始自四更至于五更乃滅其狀又如旱時月色或如禪家所云放光其召金應箕問之應箕考文獻通考以啓曰所謂赤氣也傳曰知道○月